

O D E.

V^N Corbeau deuant moy croasse,
Vn ombre offusque mes regards,
Deux belettes & deux renards
Trauersent l'endroit où ie passe,
Les pieds faillent à mon cheual,
Mon lacquay tombe du haut mal,
I'entend craqueter le tonnerre,
Vn esprit se presente à moy,
I'oy Charon qui m'appelle à soy,
Ie voy le centre de la terre.

Ce ruisseau remonte en sa source,
Vn bœuf grauit sur vn clocher,
Le sang coule de ce rocher,
Vn aspic s'accouple d'une ourse,
Sur le haut d'une vieille tour
Vn serpent deschire vn vautour :
Le feu brusle dedans la glace,
Le Soleil est deuenu noir,
Ie voy la lune qui va cheoir,
Cét arbre est forti de sa place.

Théophile de VIAU (1590-1626).